

Expectativa Economico pa 2017

Comunicado di prensa

9 di Mei, 2017

Awe Banco Central di Aruba (BCA) a publica e 'Economic Outlook' pa 2017. E publicacion aki ta inclui tambe un actualisacion di e desaroyo economico y estimacion di e Producto Domestico Bruto (PDB) pa 2016. Siguientemente, un resumen di e desaroyonan mas importante.

E economia di Aruba ta proyecta pa expande (den termino real) cu 3,4 por ciento den 2017, despues di un caida estima di 0,2 por ciento den 2016. E crecimiento di 2017 ta impulsa primordialmente door di actividadnan di rehabilitacion na e refineria. Ta spera mas bahada den prijsnan di consumo durante 2017 (-1,1 por ciento) procedente di tarifanan di coriente mas abou. Den termino medio ta anticipa un nivel di PDB mas halto, pero cu crecimiento limita.

Ingreso turistico ta proyecta pa crece nominalmente cu 1,3 por ciento na 2017. Crucial pa e resultado aki ta e intencion di e sector hotelero pa obtene un promedio di tarifa mas halto pa dia pa camber. Den termino real, turismo lo por cai levemente, como cu ta anticipa cu e cantidad di bishitante y e anochinan permaneci lo baha cu, respectivamente, 1,9 por ciento y 1,7 por ciento. Un anticipacion di aumento den buelonan procedente di Merca lo por contribui na un crecimiento den bishitante for di e mercado Mericano, pero esaki no ta suficiente pa completamente compensa pa e caida significativa den bishitantenan for di Venezuela.

Ta anticipa un crecimiento di 28,6 por ciento den termino real den inversionnan na 2017. E proyeccion aki ta assumi cu actividadnan di rehabilitacion na e refineria lo accelera manera planea na tempo y cu ta tene cuenta cu ehecuton di varios proyecto di alohamento relata na turismo y na mes momento continuacion di algun proyecto grandi cu a cuminsa na 2016. Ta premira cu e aumento den inversionnan lo crea mas entrada pa consumo priva debi na un crecimiento den empleo y pues resultando den un subida di 2,8 por ciento den consumo na 2017.

T 9/11/17

E cuenta corriente di balansa di pago ta proyecta pa registra un deficit di Afl. 240,3 milyon (4,9 por ciento di PDB) na 2017, compara cu un surplus den e ultimo dos añanan. E impulso principal pa e resultado aki ta un crecimiento fuerte den importacion di productonan (atribui parcialmente na aceleracion den e actividadnan relaciona cu e rehabilitacion di e refineria), resultando den un aumento anticipa den importacion di 7,5 por ciento na 2017. Ta anticipa un deficit den e cuenta di capital y finansa di balansa di pago di Afl. 10,6 milyon. Ademá, e intencion di gobierno pa busca su financiamiento presupuestario riba mercado domestico e aña aki, lo causa un salida significativa di fondanan.

Consecuentemente, ta anticipa cu e reserva di divisanan neto (excluyendo revaluacion) lo baha cu Afl. 275,0 milyon, alcansando Afl. 1.502,5 milyon na fin di 2017. Considerando e desaroyo proyecta, ta proyecta cu reservanan total lo yega na 5,2 luna di pagonan di cuenta corriente.

Indicadornan economico den termino real (expresa den cambio di porcentahe) (data April 2017)

Indicador	2015 ^e	2016 ^e	2017 ^p
PBD	-0,5	-0,2	3,4
Consumo	1,7	-3,7	2,8
Inversion	-5,1	-0,7	28,6
Exportacion	-0,1	0,3	-0,3
Importacion	-2,8	-3,5	7,5

Fuente: BCA.

e = estimacion; p= proyeccion

E publicacion completo ta disponibel riba nos website (www.cbaruba.org).